



Bilten Saveza općina i gradova Federacije Bosne i Hercegovine



Godina: XIX

Datum: 21.10.2022.

Broj: 282

ODRŽANA 5. SJEDNICA PREDSJEDNIŠTVA SKUPŠTINE SAVEZA



Sa sjednice Predsjedništva, 19.10.2022. godine

USLUGE SAVEZA:

- PRAVNO SAVJETOVALIŠTE:

Selma Fišek, viši saradnik za pravna pitanja
selma@sogfbih.ba

- FINANSIJSKO SAVJETOVALIŠTE

Halko Basarić, viši saradnik za finansijska
pitanja
halko@sogfbih.ba

KORISNI LINKOVI ZA FONDVE EU:

www.southeast-europe.net
www.adriaticinnovationmap.eu
www.adrioninterreg.eu
www.europa.ba
www.cbibplus.eu
www.cbc.bih-mne.org
www.srb-bih.org
www.interreg-hr-ba-me2014-2020.eu
www.programmemed.eu
<https://tacso.eu/>
<https://evinfo.ba/en/>
www.balkanfund.org
<https://eacea.ec.europa.eu>
www.welcomeurope.com

ADRESA:

Musala br.5/1
71000 Sarajevo
Telefon: +387 33 216 502,
209 024, 209 120
fax: +387 33 552 810, 216 502
savez@sogfbih.ba

Peta sjednica Predsjedništva Saveza općina i gradova Federacije Bosne i Hercegovine (SOGFBIH) održana je 19.10.2022. godine u Hadžićima. Na sjednici su razmatrana brojna pitanja i teme od značaja za jedinice lokalne samouprave (JLS) i za SOGFBIH.

Predsjedništvo SOGFBIH je dalo punu podršku uspostavljanju kreditne linije za JLS za predfinansiranje i sufinansiranje EU projekata koja je razvijena u saradnji SOGFBIH sa Razvojnog bankom Federacije Bosne i Hercegovine i Federalnim ministarstvom finansija. Ocijenjeno je da će ova kreditna linija omogućiti JLS kreditiranje EU projekata pod povoljnim kreditnim uslovima uz kamatnu stopu od 2,5 % koju će subvencionirati Federalno ministarstvo finansija, i bez obaveze provođenja postupka javnih nabavki.

Predsjedništvo SOGFBIH je upoznato sa zaključcima sa sastanka Mreže za javne finansije SOGFBIH koju čine predstavnici pomoćnika gradonačelnika/načelnika za finansije, a koji je održan 18.10.2022. godine. U okviru ovih zaključaka, predstavljena je Studija o prenesenim nadležnostima jedinicama lokalne samouprave koja će služiti Savezu u daljim procesima zagovaranja za jačanje finansijske pozicije jedinica lokalne samouprave.

Članovi Predsjedništva SOGFBIH su informisani o podnešenom Zahtjevu za zaštitu prava na lokalnu samoupravu kao i o prijedlogu za donošenje privremene mjere u vezi sa Zakonom o računovodstvu i reviziji FBiH („Službene novine FBiH“, br. 15/21) koji je Savez općina i gradova FBiH, u skladu sa nadležnostima utvrđenim u Ustavu FBiH, uputio Ustavnom sudu FBiH. Naime, Savez u svojstvu zakonskog zastupnika JLS, traži da Ustavni sud FBiH utvrdi povredu prava na lokalnu samoupravu iz razloga što je navedenim Zakonom jedinicama lokalne samouprave, koje nisu obuhvaćene godišnjim planom revizije Ureda za reviziju institucija u FBiH, nametnuta obaveza provođenja vanjske revizije. Savez nije bio konsultovan prilikom donošenja ovog zakona iako je to bila zakonska obaveza.

Pored ostalog, prezentirani su i zaključci Radne grupe za izradu metodologije raspodjele i pripadnosti javnih prihoda u FBiH koju je formirala Vlada FBiH i u kojoj SOGFBIH ima svog predstavnika.

USPOSTAVLJENA KREDITNA LINIJA ZA SUFINANSIRANJE I PREFINANSIRANJE EU PROJEKATA NA LOKALNOM NIVOU

Savez općina i gradova Federacije Bosne i Hercegovine (SOGFBiH) je u 2022. godini intenzivno radio na istraživanju interesa i potreba jedinica lokalne samouprave vezano za sufinansiranje i prefinansiranje EU projekata na lokalnom nivou. Većina anketiranih jedinica lokalne samouprave u FBiH u velikom broju se pozitivno izrazile o osnivanju ovakvog mehanizma, kojim bi se podržale prilike aplikiranja na EU fondove, odnosno kojim bi se unaprijedila apsorpcija EU fondova. Finansijski okvir za IPA (Instrument za predpristupnu pomoć) III za period 2021.-2027.- iznosi 14,2 milijarde eura, a glavni cilj jeste pripremiti zemlje kandidate i potencijalne kandidate za članstvo u EU, stavljajući u fokus kriterije za članstvo, jačanje održivog ekonomskog razvoja i investicija, te oporavak od ekonomske krize izazvane COVID-19. Važno je napomenuti da, za razliku od ranijeg pristupa, više se neće izdvajati sredstva za svaku državu korisnicu (državna koverta), već će se primjenjivati princip raspodjele prema zaslugama država korisnica.



Imajući u vidu i da je **Strategijom razvoja FBiH 2021.-2027. predviđeno osnivanje mehanizma kojim bi se podržale jedinice lokalne samouprave kroz prefinansiranje i sufinansiranje EU projekata**, a na osnovu iskazanih potreba članica SOGFBiH, inicirano je osnivanje finansijskog mehanizma putem kojeg bi općine i gradovi bili u mogućnosti brzo, transparentno i uz minimalne troškove doći do potrebnih sredstava za EU projekte na lokalnom nivou. Razvojna banka FBiH je podržala ovu inicijativu u skladu sa Strategijom razvoja FBiH 2021.-2027., te je **unutar Razvojne banke FBiH vlastitim sredstvima uspostavljena Kreditna linija za sufinansiranje i prefinansiranje EU projekata na lokalnom nivou.**

Kreditna linija služi za sufinansiranje, implementaciju projekata i ostalo finansiranje jedinica lokalne samouprave, te razvojnih agencija u vlasništvu ili većinskom vlasništvu općina i gradova, koje su zadovoljile uvete natječaja za bespovratna sredstva koji su finansirani iz budžeta Evropske unije i/ili nacionalnih izvora, te drugih inozemnih izvora. Kreditnim sredstvima moći će se finansirati svi troškovi provedbe projekta, i to za prihvatljive izdatke i za neprihvatljive izdatke (izdaci koji čine dio projekta, a koje nije moguće kandidirati za bespovratna sredstva), uz kamatnu stopu od 2,5%.

Prepoznajući značaj ovakvog mehanizma kojim će biti finansirani razvojni projekti na lokalnom nivou, unaprijeđen kvalitet lokalnih usluga i apsorpcija EU fondova, **Vlada FBiH je prihvatila inicijativu SOGFBiH za subvencioniranje kamate za navedenu Kreditnu liniju za korisnike koji uredno izmiruju obaveze. S obzirom da se radi o najpovoljnijim sredstvima na tržištu, općine i gradovi u FBiH nisu u obavezi provoditi proceduru javne nabavke za ovu Kreditnu liniju.**

Savez općina i gradova FBiH poziva članice da iskoriste mogućnost koje nudi Kreditna linija za sufinansiranje i prefinansiranje EU projekata na lokalnom nivou uz subvenciju kamate od strane Vlade FBiH. Detaljnije informacije o uslovima Kreditne linije mogu se dobiti kod Razvojne banke FBiH.

Vlada FBiH je prihvatila inicijativu SOGFBiH za subvencioniranje kamate za navedenu Kreditnu liniju za korisnike koji uredno izmiruju obaveze. S obzirom da se radi o najpovoljnijim sredstvima na tržištu, općine i gradovi u FBiH nisu u obavezi provoditi proceduru javne nabavke za ovu Kreditnu liniju.

ČETVRTA MREŽA ZA JAVNE FINACIJE/FINANSIJE SOGFBiH

Četvrti sastanak Mreža za javne financije/finansije, koje je konzultativno i koordinaciono tijelo za pitanja lokalnih financija pri Savezu općina i gradova, održana je 18.10.2022. godine uz prisustvo više od 50 pomoćnika za financije u općinama i gradovima u FBiH. Na ovoj sjednici Mreže prezentirana je Studija o nadležnostima za javne rashode jedinica lokalne samouprave. Studija je imala za cilj istražiti prenesene nadležnosti jedinicama lokalne samouprave sa viših nivoa vlasti, kao i implikacije koje ove dodatne nadležnosti za rashode imaju na lokalne budžete. Analitičnim pristupom i kombiniranjem desk istraživanja, ankete i polustrukturiranih intervjua, Studija je još jednom potvrdila da je došlo do prijenosa dodatnih rashodovnih nadležnosti koje nije pratio prijenos adekvatnih izvora financiranja. Pored direktnog prijenosa nadležnosti





Sa sastanka Mreža za javne financije/finansije, 18.10.2022.

Jedan ods zaključaka sastanak Mreže je potreba organiziranja jednodnevne konferencije na kojoj bi tema tržišne konkurencije bila detaljnije obrađena, uz učešće na načelnika i gradonačelnika.

nadležnosti za javne rashode, došlo je i do povećanja lokalnih rashoda zbog podizanja standarda u pružanju usluga (kao pr. u vatrogastvu, azili za životinje), te zbog dodatnog opterećenja lokalne uprave zbog vođenja administrativnih postupaka za potrebe viših nivoa vlasti (n.pr. u sektoru boračke zaštite, socijalne zaštite). Jedinstven stav učesnika IV sastanka Mreže jeste da je potrebno jačanje pozicije općina i gradova, kao i sistema koordinacija i konsultacija sa višim nivoima vlasti. SOGFBiH će navedenu Studiju koristiti za zastupanje interesa članica SOGFBiH pred višim nivoima vlasti, kao i za lobiranje za interese općina i gradova.

Učesnici ovog sastanka Mreže informirani su i da je SOGFBiH, temeljem zaključka Predsjedništva Skupštine SOGFBiH, Ustavnom sudu FBiH podnio Zahtjev za zaštitu prava na lokalnu upravu, vezano za Zakon o računovodstvu u reviziji FBiH (Sl. novine FBiH br. 15/21), kao i privremenu mjeru za obustavu primjene pojedinih članova Zakona o računovodstvu i reviziji.

Imajući u vidu da je u toku izrada nove metodologije raspodjele i pripadnosti javnih prihoda u FBiH, učesnici sastanka informirani su i o najvažnijim zaključcima koje je usvojila Radna grupa za izrade metodologije imenovana od strane Vlade FBiH. SOGFBiH ima jednog predstavnika u ovoj Radnoj grupi, a zaključkom je zadužena Stručna služba SOGFBiH da nastavi pratiti, analizirati i informirati pomoćnike za financije u vezi sa nastavkom rada na izradi metodologije.

Predstavnici Konkurencijskog vijeća BiH upoznali su prisutne članove Mreže za javne financije/finansije sa zakonodavnim okvirom za regulacije tržišnog natjecanja u BiH. S obzirom na funkciju i nadležnosti koje Konkurencijsko vijeće BiH ima u sistemu nadzora tržišne konkurencije, a imajući u vidu s druge strane da općinski organi odnosno javna poduzeća često mogu imati monopolsku poziciju u određenom sektoru, prezentirani su i slučajevi iz lokalnih zajednica gdje je Konkurencijsko vijeće reagiralo shodno odredbama Zakona o konkurenciji BiH. Sudjelovanje Konkurencijskog vijeća na Mreži za javne financije/finansije organizirano je prije svega kako bi se predstavnici općina i gradova upoznali za djelokrugom rada i do sada izrečenim mjerama od strane Konkurencijskog vijeća BiH, a u svrhu usklađivanja rada općinskih i gradskih organa i institucija sa pravnom regulativom vezano za tržišnu konkurenciju, a kako bi se preveniralo penaliziranje organa uprave i drugih javnih organizacija na lokalnom nivou zbog kršenja tržišne konkurencije. Zaključeno je da je neophodno upoznati i načelnike i gradonačelnike sa spomenutom tematikom, te je usvojen zaključak kojim se traži organiziranje jednodnevne konferencije na kojoj bi tema tržišne konkurencije bila detaljnije obrađena, uz učešće na načelnika i gradonačelnika.



Sa sastanka Mreža za javne financije/finansije, 18.10.2022.

SOGFBiH je već duži vremenski period angažiran na uspostavljanju finansijskog mehanizma koji bi stajao općinama i gradovima prilikom apliciranja na EU i druge međunarodne projekte. Kroz saradnju sa Razvojn timer bankom FBiH i Federalnim ministarstvom financija, uspostavljena je unutar Razvojne banke FBiH Kreditna linija za sufinansiranje i predfinanciranje EU i drugih projekata na lokalnom nivou. Za ovu kreditnu liniju nije potrebno provoditi javnu nabavku, a kamatnu stopu od 2,5% u cijelosti će refundirati Vlada FBiH za uredne klijente. S obzirom da će kroz IPA III na raspolaganju zemljama kandidatkinjama i potencijalnim kandidatkinjama biti na raspolaganju 14,2 mil Eura, a imajući u vidu da će alociranje na pojedinačne države biti na osnovu zasluga pojedinih država a ne na osnovu izdvojenih sredstava za pojedinačnu državu (državna koverta), ova Kreditna linija ima potencijal značajno unaprijediti apsorpciju EU fondova na lokalnom nivou.

Sve informacije vezano Kreditnu liniju za sufinansiranje i predfinanciranje EU i drugih projekata na lokalnom nivou možete dobiti kod Razvojne banke FBiH.

SAVEZ OPĆINA I GRADOVA FBiH UPUTIO ZAHTJEV ZA ZAŠTITU PRAVA NA LOKALNU SAMOUPRAVU U VEZI SA ZAKONOM O RAČUNOVODSTVU I REVIZIJI U FBiH

Savez općina i gradova Federacije BiH je 30.09.2022. godine, u skladu sa odlukom Predsjedništva Skupštine Saveza, a na osnovu ovlaštenja propisanih Ustavom Federacije Bosne i Hercegovine, prema Ustavnom Sudu Federacije BiH uputio Zahtjev za zaštitu prava na lokalnu samoupravu u vezi sa Zakonom o računovodstvu i reviziji u FBiH („Službene novine FBiH“, br. 15/21).

Savez nije konsultovan prilikom usvajanja Zakona o računovodstvu i reviziji u Federaciji Bosne i Hercegovine („Službene novine FBiH“, br. 15/21) kojim je jedinicama lokalne samouprave nametnuta obaveza provođenja vanjske revizije, a što je bila zakonska obaveza, imajući u vidu da je članom 56. Zakona o principima lokalne samouprave u Federaciji Bosne i Hercegovine propisano da su „Federalne, odnosno kantonalne vlasti dužne u najvećoj mogućoj mjeri konsultovati jedinice lokalne samouprave u postupku donošenja propisa koji ih se direktno tiču.

Konsultovanje, u smislu iz prethodnog stava ovog člana, federalne, odnosno kantonalne vlasti vrše putem saveza općina i gradova“.

Također, predlagač Zakona o računovodstvu i reviziji u Federaciji Bosne i Hercegovine nije putem Saveza tražio podatke o fiskalnoj procjeni zakona na način kako je to propisano članom 6. stav 1. Pravilnika o proceduri za izradu izjave o fiskalnoj procjeni zakona, drugih propisa i akata planiranja na budžet ("Sl. novine FBiH", br. 34/16).

U okviru ovog zahtjeva, Savez je Ustavnom sudu podnio i prijedlog za donošenje privremene mjere kojom se traži obustava primjene člana 57. stav 4. Zakona o računovodstvu i reviziji u Federaciji Bosne i Hercegovine a kojim je utvrđena obaveza provođenja vanjske revizije za JLS koje nisu obuhvaćene godišnjim planom revizije Ureda za reviziju institucija u FBiH.

Iz navedenih razloga smo Ustavnom sudu Federacije BiH uputili Zahtjev za zaštitu prava na lokalnu samoupravu, te ćemo u narednom periodu obavještavati naše članice i javnost o toku ovog sudskog postupka.



VLADA FBiH RASPOREDILA 39 MILIONA KM OPĆINAMA I GRADOVIMA U FBiH

Vlada Federacije Bosne i Hercegovine je 08.08.2022. donijela Odluku o raspodjeli sredstava utvrđenih Budžetom FBiH za 2022. godinu Federalnom ministarstvu finansija sa ekonomskih kodova tekućih i kapitalnih transfera drugim nivoima vlasti i fondovima - KANTONI I OPĆINE. Ovom Odlukom se iznos od 10.000.000 KM raspoređuje na 80 općina i gradova u jednakom iznosu od 125.000 KM za svaku jedinicu lokalne samouprave. Preostali iznos od 28.999.305 KM dodjeljuje se općinama i gradovima na osnovu ranije objavljenog javnog poziva za finansiranje/sufinansiranje projekata na lokalnom nivou. Vlada FBiH će s načelnicima i gradonačelnicima općina i gradova zaključiti pojedinačne ugovore o dodjeli i korištenju sredstava, kojima će biti regulirana međusobna prava i obaveze, a za njihovo potpisivanje je u ime Vlade FBiH.

Savez općina i gradova FBiH zalaže se od 2020. godine za ovakav način raspodjele, a na osnovu dijaloga i pregovora sa Vladom FBiH. Ova inicijativa je dovela do toga da Vlada FBiH dodjeljuje grant sredstava za općine i gradove sad već kao ustaljenu praksu, a sve na osnovu iskazanih zahtjeva općina i gradova koordiniranih putem Saveza.

PREDSTAVLJENA „ANALIZA TRENUTNOG REGULATORNOG STATUSA MJESNIH ZAJEDNICA U PARTNERSKIM JEDINICAMA LOKALNE SAMOUPRAVE I PREPORUKE ZA POBOLJŠANJE I/ILI PRILAGOĐAVANJE ZAKONODAVNOG OKVIRA RODNO OSJETLJIVIM MODELIMA VIZIJE MJESNIH ZAJEDNICA“

U Sarajevu je, 11.10.2022. godine održan sastanak u okviru aktivnosti Saveza općina i gradova FBiH na Projektu „Jačanje uloge mjesnih zajednica u BiH“.

Tom prilikom, koordinadorima iz 11 partnerskih jedinica lokalne samouprave (Općina Bosansko Grahovo, Općina Bužim, Općina Hadžići, Općina Ilidža, Općina Kalesija, Općina Lukavac, Grad Mostar, Općina Velika Kladuša, Općina Drvar, Općina Kakanj i Općina Travnik) predstavljena je „Analiza trenutnog regulatornog statusa mjesnih zajednica u partnerskim jedinicama lokalne



Sa predstavljanje Analize,
11.10.2022.

Analiza je ocijenjena kao veoma kvalitetan dokument koji sadrži jasne preporuke za svaku od 11 partnerskih jedinica lokalne samouprave u oblasti prilagođavanja zakonodavnog okvira rodno osjetljivim modelima vizije mjesnih zajednica.

samouprave i preporuke za poboljšanje i/ili prilagođavanje zakonodavnog okvira rodno osjetljivim modelima vizije mjesnih zajednica izrađena u okviru Projekta „Jačanje uloge mjesnih zajednica u BiH“.

Učesnici sastanka su ovu Analizu ocijenili kao veoma kvalitetan dokument koji sadrži jasne preporuke za svaku od 11 partnerskih jedinica lokalne samouprave u oblasti prilagođavanja zakonodavnog okvira rodno osjetljivim modelima vizije mjesnih zajednica.

Takođe, prisutni su informisani o predstojećim obukama za koordinatore i izabrane zvaničnike iz partnerskih jedinica lokalne samouprave na temu metodologije i nove vizije mjesnih zajednica.

Savez općina i gradova FBiH učestvuje u realizaciji II faze projekta „Jačanje uloge mjesnih zajednica u Bosni i Hercegovini“ koji provodi UNDP uz finansijsku podršku Vlade Švicarske i Vlade Švedske.

ODRŽANA OBUKA NA TEMU INTEGRISANO UPRAVLJANJE URBANIMA VODAMA

U okviru projekta "Regionalna mreža za unapređenje kapaciteta u oblasti vodosnabdijevanja i odvodnje" (RCDN) u Banja Luci je, 19. i 20.10.2022. godine održana dvodnevna edukacija na temu "Integrirano upravljanje urbanim vodama". Učešće u obuci je uzelo više od 20 predstavnika vodo- vodnih preduzeća i lokalnih zajednica iz oba entiteta Bosne i Hercegovine, i to: Banja Luka, Bosanski Petrovac, Cazin, Doboij, Gračanica, Laktaši, Prnjavor, Tešanj, Zenica i Zvornik.



Sa obuke na temu "Integrirano upravljanje urbanim vodama"

Edukacija ima za cilj jačanje kapaciteta lokalnih donosioca odluka u razumijevanju značaja i važnosti te osnovnog funkcioniranja sistema prikupljanja i prečišćavanja otpadnih voda i jačanje interakcije među donosiocima odluka iz JLS i JVP/JKP.

Nastavak edukacije na temu "Razvoj kapitalnih infrastruktura" biće održan 30.11. i 1.12. u Mostaru.

Podršku održavanju edukacije pružili su: Savez općina i gradova Federacije Bosne i Hercegovine, Savez opština i gradova Republike Srpske, Udruženje/Udruga preduzeća/poduzeća komunalne privrede/gospodarstva u FBiH i Udruženje vodovodi Republike Srpske.

ODRŽANA RADIONICA ZA IZRADU AKCIONOG PLANA ZA ODRŽIVU ENERGIJU I KLIMU (SECAP)



Sa radionice SECAP

Na Jahorini je 8. i 9. septembra održana radionica za izradu Akcionog plana za održivu energiju i klimu (SECAP). Radionica je dio podrške koju ovaj projekat pruža općinama i gradovima u procesu izrade Akcionog plana za održivu energiju i klimu (SECAP). Cilj radionice je zajednička izrada plana rada i vremenskog okvira za izradu SECAP-a, mapiranje zainteresovanih strana i procesa, kao i identifikiranje potreba za daljim obukama i razvojem kapaciteta. Angažovani eksperti za podršku u pripremi baznog inventara gasova (BEI) i procjene rizika i ranjivosti (RVA) su ovom prilikom predstavili plan rada i saradnje sa 4 odabrane općine/grada.

Radionica je sprovedena u sklopu projekta EU za energetska tranziciju – Sporazum gradonačelnika na Zapadnom Balkanu i u Turskoj, koji zajednički kofinansiraju Evropska unija i Savezno Ministarstvo za ekonomsku saradnju i razvoj Republike Njemačke, a sprovodi ga GIZ na Zapadnom Balkanu. Ove aktivnosti se sprovode u saradnji sa Savezom općina i gradova Federacije Bosne i Hercegovine i Savezom opština i gradova Republike Srpske.

SAVEZ PROMOVIRA PRAKSU TRANSPARENTNOG FINANSIRANJA OCD

Savez općina i gradova Federacije Bosne i Hercegovine od 15. septembra 2021. godine realizira trogodišnji projekat „Podrška razvoju uslužno orijentisane lokalne samouprave u Federaciji Bosne i Hercegovine“. Aktivnosti projekta naslanjaju se na „Regionalni program lokalne demokratije na Zapadnom Balkanu 2“ (ReLOaD2), koji finansira Evropska unija (EU), a sprovodi Razvojni program Ujedinjenih nacija (UNDP). ReLOaD2 je četverogodišnji projekat (januar 2021. - decembar 2024. godine) - nastavak je inicijativa podržanih od strane EU – Jačanje lokalne demokratije (LOD, 2009-2016) i naknadno proširenog Regionalnog programa lokalne demokratije na Zapadnom Balkanu (ReLOaD, 2017-2020).

Aktivnosti Saveza primarno su usmjerene na saradnju sa 7 ReLOaD2 partnerskih JLS na teritoriji Federacije Bosne i Hercegovine, kao i na promociju LOD metodologije među JLS koje su aplicirale za učešće u ReLOaD2 projektu, a nisu ušle.

U okviru svojih aktivnosti Savez trenutno uspostavlja saradnju sa šest JLS koje nisu prošle u projekat s ciljem promocije LOD metodologije. Sastanci su održani sa sljedećim JLS: Domaljevac Šamac, Banovići, Drvar i Čitluk. Tokom narednih dana sastanci će biti održani i u općinama Ilijaš i Trnovo.

Svrha sastanka je da se utvrdi da li postoji potreba, mogućnost i spremnost od strane općinskog rukovodstva za usvajanje LOD metodologije kao transparentnog načina finansiranja OCD putem javnog poziv po projektnom principu.

Iskustvo sa do sada održanih sastanaka govori da su JLS u velikoj mjeri upoznate sa LOD metodologijom, te u potpunosti shvaćaju sve prednosti i koristi primjene LOD Metodologije, kako za JLS, tako i za građane.

Savez će ponuditi svim zainteresiranim JLS tehničku pomoć u pogledu izrade i donošenja Odluke o prihvatanju LOD metodologije.

ReLOaD
Regionalni program lokalne demokratije na Zapadnom Balkanu

Aktivnosti Saveza primarno su usmjerene na saradnju sa 7 ReLOaD2 partnerskih JLS, kao i na promociju LOD metodologije među JLS koje su aplicirale za učešće u ReLOaD2 projektu, a nisu ušle.

SAVEZ OPĆINA I GRADOVA FBiH JE POTPISNIK MEMORANDUMA O RAZUMIJEVANJU SA KONGRESOM LOKALNIH I REGIONALNIH VLASTI VIJEĆA EVROPE

U sklopu Evropske konferencije o demokratskoj obnovi: inoviranje putem deliberativne demokratije, Savez općina i gradova Federacije BiH na čelu sa direktoricom gospođom Vesnom Travljanin je potpisnik Memoranduma o razumijevanju sa Kongresom lokalnih i regionalnih vlasti Vijeća Evrope za realizaciju projekta Inoviranje demokratskog učešća na lokalnom nivou u Bosni i Hercegovini, a koji je u sklopu Akcionog plana Vijeća Evrope 2022-2025.

19.09.2022. godine, kada je i potpisan Memorandum, održan je sastanak Upravnog odbora na kojem je usvojen Pravilnik o radu Upravnog odbora, čija je članica direktorica Saveza općina i gradova FBiH, gospođa Vesna Travljanin.

Konferencija je održana 20.09.2022. godine u Mostaru, a ista je imala za cilj da identifikuje glavne izazove deliberativne demokratije te da predstavi dobre prakse u različitim evropskim kontekstima. Diskusije će se baviti aktuelnim pitanjima vezanim za ovu vrstu inovativnih procesa, uključujući praćenje sprovođenja preporuka, institucionalizaciju, potencijal da osnaže nedovoljno zastupljene grupe, te njihovu upotrebu kao vrijednih alata za dopunu drugih participativnih inicijativa. Širok spektar lokalnih vlasti, kreatora politika i istraživača širom Evrope učestvovat će u razmjeni iskustava te koristiti dobre prakse i preporuke s ciljem repliciranja i umnožavanja deliberativnih procesa u Bosni i Hercegovini i u jugoistočnoj Evropi.

U uvodnom govoru su se obratili gradonačelnik Grada Mostara, gospodin Mario Kordić, direktor Kongresa lokalnih i regionalnih vlasti gospodin Rafael Benitez i gospođa Bojana Urumova, šefica Kancelarije Vijeća u Sarajevu. U okviru konferencije se održavaju tri okrugla stola na teme: Praćenje deliberativnih procesa: jačanje kredibiliteta i uticaja preporuka građana, Institucionalizacija deliberativnih procesa: putevi i izazovi ka kolaborativnom lokalnom donošenju odluka, Izazov i potreba za usvajanjem inkluzivnog pristupa: prevladavanje razlika u multikulturalnim društvima kroz deliberativne procese. Učesnici skupa su predstavnici viših nivoa vlasti, akademske zajednice, lokalnih vlasti, nevladinih organizacija iz Poljske, Irske, Sjeverne Irske, Ujedinjeno Kraljevstvo, Francuske, Belgije, Italije, Turske i Bosne i Hercegovine.



Sa potpisivanja Memoranduma

Ova konferencija je organizovana u okviru projekta „Inoviranje demokratskog učešća na lokalnom nivou u Bosni i Hercegovini“ kojeg sprovodi Kongres lokalnih i regionalnih vlasti u sklopu Akcionog plana Savjeta Evrope za Bosnu i Hercegovinu 2022.-2025. Projekat ima za cilj poboljšati kvalitet lokalne demokratije i stvoriti mogućnosti za građane da se uključe u inovativne participativne procese u Mostaru i drugdje u Bosni i Hercegovini. Također, promoviše nove demokratske pristupe, otvorenu vlast, javnu etiku, transparentno i inkluzivno kreiranje lokalne politike u zemlji.

JAVNI POZIV ZA KANTONE I JLS ZA PODNOŠENJE PRIJAVA ZA UČEŠĆE U IMPLEMENTACIJI PROGRAMA „OKVIR ZA REALIZACIJU CILJEVA ODRŽIVOG RAZVOJA KAO TEMELJ ZA ODRŽIV I INKLUZIVAN RAST U BOSNI I HERCEGOVINI“ (SDG2BIH)



Javni poziv za kantone i jedinice lokalne samouprave u Bosni i Hercegovini za podnošenje prijava za učešće u implementaciji Programa „Okvir za realizaciju Ciljeva održivog razvoja kao temelj za održiv i inkluzivan rast u Bosni i Hercegovini“ (SDG2BiH) otvoren je od 21.10.2022. do 21.11.2022. godine. SDG2BiH finansira Vlada Švedske a implementira UNDP u partnerstvu sa UNICEF-om i UNWOMEN u BiH, uz koordinaciju ureda Rezidentne koordinatore UN-a.

Cilj ovog poziva je odabir do 8 JLS i 3 kantona kojima će se pružiti podrška u:

- Procesu lokalizacije i operacionalizacije Ciljeva održivog razvoja kroz sistemsku implementaciju strategija razvoja kantona i JLS;
- Razvoju i pripremi dokumentacije za strateške projekte koji doprinose ostvarivanju Ciljeva održivog razvoja;
- Pripremi i implementaciji razvojnih projekata.

Poziv je namijenjen JLS i kantonima koji imaju uspostavljen funkcionalan sistem upravljanja razvojem, ostvaruju značajne razvojne rezultate, vode računa o najugroženijim grupama stanovništva te žele postati istinski lideri u provođenju Ciljeva održivog razvoja. Smjernice za podnosiocima prijave, dodatne informacije, kao i sve materijale Javnog poziva, možete pronaći na web adresi https://procurement-notice.undp.org/view_notice.cfm?notice_id=96507

POZIV TRENERIMA I KONSULTANTIMA IZ BOSNE I HERCEGOVINE ZA UČESTVOVANJE U PROGRAMU TRENINGA TRENERA IZ OBLASTI INTERNIH FINANSIJSKIH KONTROLA I PRIMJENE PRINCIPA „VRIJEDNOST ZA NOVAC“ U JEDINICAMA LOKALNE SAMOUPRAVE U BOSNI I HERCEGOVINI

Projekat „Unapređenje upravljanja javnim finansijama u Bosni i Hercegovini“ (PFD) upućuje poziv trenerima i konsultantima iz BiH za podnošenje prijave za učešće u programu treninga trenera iz oblasti internih finansijskih kontrola i primjene principa „vrijednost za novac“ u jedinicama lokalne samouprave (JLS) u Bosni i Hercegovini (BiH).

Projekat „Unapređenje upravljanja javnim finansijama u Bosni i Hercegovini“ (PFD) se realizuje uz podršku Vlade Slovačke (Ministarstvo finansija Slovačke), a implementira ga Razvojni program Ujedinjenih nacija (UNDP). Projekat ima za cilj osnažiti lokalne samouprave u upravljanju budžetskim sredstvima kroz unapređenje sistema internih finansijskih kontrola, a sa ciljem povećanja odgovornosti i transparentnosti u finansijskom upravljanju od strane lokalnih i kantonalnih vlasti.

PFD je, između ostalog, u prethodnom periodu podržao izradu analize pravnog i regulatornog okvira za interne finansijske kontrole u BiH te analize stanja sistema internih finansijskih kontrola u 15 partnerskih JLS i dva kantona. Na osnovu ovih analiza identificirane su potencijalne slabosti ali i dobre prakse u sistemima internih finansijskih kontrola u partnerskim JLS i kantonima. Pored navedenog, PFD je podržao izradu programa treninga trenera sa ciljem osposobljavanja nove generacije trenera i konsultanata koji bi pružali trenerske i konsultantske usluge kantonalnim organima uprave te JLS.

Program **treninga trenera iz oblasti internih finansijskih kontrola i primjene principa „vrijednost za novac“** se organizuje kao dvodnevni trening za dvije grupe učesnika (10 - 15 učesnika).

PFD je podržao izradu programa treninga trenera sa ciljem osposobljavanja nove generacije trenera i konsultanata koji bi pružali trenerske i konsultantske usluge kantonalnim organima uprave te JLS.

Trenerski tim čine g-đa Vesna Novaković i g-din Nedim Čustović koji posjeduju višegodišnje iskustvo u oblasti internih kontrola.

O terminima i lokaciji treninga odabrani kandidati će biti blagovremeno obaviješteni.

Tokom treninga učesnici će učestvovati u interaktivnim diskusijama, vježbama, aktivnoj razmjeni iskustava kao i ulaznom i izlaznom testu znanja. Za uspješno završen trening učesnici trebaju imati minimalno 80% tačnih odgovora na izlaznom testu.

Uspješno završen trening program će biti preduslov za prijavljivanje na javne oglase za pružanje trenerskih usluga iz oblasti finansijskog upravljanja i kontrole te primjene principa "vrijednost za novac" u partnerskim JLS u BiH, a koje će organizovati PFD direktno, ili u saradnji sa partnerskim institucijama u BiH.

Preduslovi za učešće u programu treninga trenera:

- Minimalno univerzitetski stepen obrazovanja u oblasti ekonomije, javne administracije, menadžmenta, računovodstva ili drugoj relevantnoj oblasti za finansijsko upravljanje i kontrolu;
- Minimalno 3 godine prethodnog iskustva: u razvoju kapaciteta i/ili pružanju tehničke podrške korisnicima iz javnog sektora u BiH u oblasti Finansijskog upravljanja i kontrole (FUK), i/ili direktno učešće u izradi strateških dokumenata vezanih za oblast internih finansijskih kontrola.

Način podnošenja prijave

Prijave za učešće u programu treninga trenera se podnose elektronski, putem e-maila: tarik.velic@undp.org, a najkasnije do 28.10.2022. godine, do 12h. Uz prijavu se dostavljaju i dokazi o ispunjenim preduslovima za učešće u programu treninga trenera (kopija diplome o stečenom stepenu obrazovanja te kopije ugovora i/ili potvrde o potrebnom iskustvu). Za učešće u programu treninga trenera biti će pozvani najuspješniji kandidati koji ispunjavaju preduslove za učešće.

NAJAVA OBILJEŽAVANJA DANA OPĆINA / GRADOVA ZA MJESEC NOVEMBAR / STUDENI

17. novembar/studen - Dan Općine Čelić. Na taj datum 1991. godine putem referenduma 99% stanovništva se izjasnilo za izdvajanje iz sastava opštine Lopare i SAO Semberija i Majevisa.

18. novembar/studen - Dan Općine Grude. Na ovaj datum 1991. godine osnovana je Hrvatska zajednica Herceg-Bosna, kao politička, kulturna, ekonomska i teritorijalna organizacija hrvatskog naroda u BiH.



Gledajte Savez općina i gradova
Federacije Bosne i Hercegovine na



Poštovani čitaoci,

putem ovog biltena pružamo Vam mogućnost da se informišete o aktivnostima Saveza, o bitnim dešavanjima u općinama i gradovima, aktivnostima naših partnera, institucija vlasti, kao i o razmjeni najboljih iskustava i praksi.

Na ovaj način pružamo informacije o održanim sjednicama organa i tijela Saveza, konferencijama, seminarima, radionicama, okruglim stolovima, javnim raspravama, projektnim aktivnostima i sl.

Ukoliko želite da se prijavite za primanje ovog biltena možete to učiniti tako što ćete poslati e-mail na: dino@sogfbih.ba; ili putem popunjavanja forme na našoj web stranici.

Molimo vas da informacije o našem biltenu proslijedite svima u vašoj i susjednim JLS i drugim zainteresiranim.

Ukoliko želite da objavite neke od vaših novosti, iskoristite bilten Saveza koji je brz i efikasan način komuniciranja.

Sa zadovoljstvom očekujemo vaše komentare, sugestije ili primjedbe.